



BOLETÍN RSU FEBREIRO 2020

UNIVERSIDADE DE VIGO.



Entrega, en xuño de 2019, da anterior edición dos premios. Foto: Deputación de Pontevedra.

CINCO EGRESADAS E UN EGRESADO RECIBIRÁN ESTA SEMANA EN VIGO OS PREMIOS SOFÍA NOVOA

DUVI 03/02/2020

Cinco egresadas e un egresado da Universidade de Vigo recibirán este mércores na nova sede da Deputación de Pontevedra en Vigo –na rúa Eduardo Chao- a IV edición dos Premios Sofía Novoa, uns galardóns convocados pola Deputación de Pontevedra en colaboración coa propia Universidade de Vigo para recoñecer a inclusión da perspectiva de xénero nos traballos de fin de grao e fin de máster presentados na UVigo durante o curso 2018/2019. [+info.](#)



Imaxe de grupo do alumnado e persoal docente e investigador implicado no desenvolvemento da feira.

ARREDOR DE 120 ALUMNAS E INVESTIGADORAS DO CAMPUS E 300 ESCOLARES PARTICIPARÁN EN 'EXXPERIMENTA EN FEMININO'

ROSA TEDÍN DUVI OURENSE 04/02/2020

O día 12 de febreiro o campus de Ourense volverá a acoller unha nova edición de *Exxperimenta en feminino*, a III Xornada de divulgación en ciencia, tecnoloxía, enxeñaría e matemáticas. Nesta feira 120 estudantes e persoal docente e investigador do campus, maioritariamente mulleres, desenvolverán 14 obradoiros prácticos para 300 escolares da provincia de Ourense co obxectivo de fomentar nelas e neles a curiosidade científica e os referentes femininos no eido científico e tecnolóxico. [+info.](#)



O vicepresidente da Xunta de Galicia, Alfonso Rueda; o reitor da Universidade de Vigo, Manuel Reigosa; o director do Campus do Mar, Daniel Rey.

O LABORATORIO BLUEBIOLAB SITUARÁ Á EUORREXIÓN NA VANGARDA DA BIOTECNOLOXÍA MARIÑA

M. DEL RÍO DUVI 04/02/2020

Hai un ano botaba a andar o proxecto BlueBioLab, liderado polo Campus do Mar, cuxa principal finalidade era a creación dun Laboratorio Transfronteirizo de Biotecnoloxía Mariña. Este obxectivo está xa cumprido e hoxe martes presentouse en sociedade o laboratorio, que nace como unha posta en común das infraestruturas existentes en Galicia e o norte de Portugal. [+info.](#)



Xosé Mahou, director da Área de Responsabilidade Social Corporativa da Universidade de Vigo.

MULTIPLÍCANSE AS ACTIVIDADES COAS QUE ACHEGAR Á COMUNIDADE UNIVERSITARIA A AXENDA 2030

D. BESADÍO DUVI 04/02/2020

A UVigo multiplicará este cuadrimestre as actividades relacionadas coa Axenda 2030 para o Desenvolvemento Sostible aprobada pola Asemblea das Nacións Unidas en 2015. Trátase, segundo indica o director da Área de Responsabilidade Social, Xosé Mahou, de que toda a comunidade universitaria se vaia familiarizando e vaian introducindo a Axenda e os ODS no seu traballo diario. [+info](#).



Imaxe gañadora da 1ª edición do concurso. Autora da Imaxe: Ana García.

NA PROCURA DE IMAXES QUE RACHEN COS ESTEREOTIPOS DE XÉNERO NA ENXEÑARÍA

DUVI 04/02/2020

Unha enxeñeira no alto dun aeroxenerador e outra traballando nunha canteira. Estas foron as dúas imaxes que o ano pasado gañaron a 1ª edición do [concurso de fotografía MULLE.Rme](#), unha iniciativa da que agora se lanza a súa segunda edición e coa que a Escola de Enxeñaría de Minas e da Enerxía busca rachar cos estereotipos de xénero no mundo da enxeñaría. Aberto a toda a cidadanía e organizado ao abeiro da celebración do 8 de marzo, día internacional das mulleres, o obxectivo deste concurso é dar visibilidade a muller nas actividades relacionadas coa profesión de enxeñaría de minas e enerxía. [+info](#).



O seminario celebrouse na Facultade de Dereito.

UN SEMINARIO AFONDA NA “DEBILIDADE” DO CÓDIGO PENAL FRONTE AOS DELITOS SEXUAIS

ROSA TEDÍN DUVI OURENSE 05/02/2020

O coñecido como caso da manada e outros similares que lle seguiron, levaron ao debate público como a xustiza afronta o castigo das agresións e abusos sexuais. Co obxectivo de analizar a evolución histórica da consideración penal destes delitos, as súas cuestións máis controvertidas e as propostas de reforma existentes, este mércores a Facultade de Dereito do campus de Ourense organizou un seminario no que Francisco Javier Álvarez, catedrático de Dereito Penal da Universidad Carlos III de Madrid, puxo en evidencia a “debilidade” do Código Penal español á hora de xulgar a violencia contra as mulleres. [+info](#).



A aula permanente do campus conta este curso con preto de 40 alumnos e alumnas.

UN ESPAZO NO QUE FACER XERMINAR E MEDRAR A PAIXÓN POLA MÚSICA TRADICIONAL

EDUARDO MUÑIZ DUVI PONTEVEDRA 05/02/2020

Das primeiras nocións respecto dun instrumento concreto á preparación dun repertorio común para un concerto de fin de curso, a Aula Permanente de Música Tradicional Galega do campus busca, por terceiro ano consecutivo, espertar e facer medrar a paixón e o interese dos seus preto de 40 alumnos e alumnas polos instrumentos populares galegos e pola música tradicional. Baixo a dirección do músico e docente Suso Vaamonde, esta actividade pechaba recentemente a súa inscrición para o segundo cuadrimestre. [+info.](#)



As correspondentes coas autoridades presentes no acto.

NOVE ESTUDANTES PARTICIPAN NO CAMPUS NO PROGRAMA DE CORRESPONDENTES UNIVERSITARIOS

DUVI OURENSE 05/02/2020

A Facultade de Ciencias da Educación acolleu este mércores un encontro do alumnado universitario que no campus de Ourense participa no programa Correspondentes Universitarios con representantes tanto da Dirección Xeral de Xuventude, Participación e Voluntariado como da Universidade de Vigo. Nesta iniciativa, implantada nas tres universidades galegas, participan este curso académico 72 estudantes, 19 deles na Universidade de Vigo. [+info.](#)



Alumnado do IES O Couto participando nunha das sesións.

UN LABORATORIO DE MICROBIOLOXÍA NO INSTITUTO

DUVI OURENSE 06/02/2020

Co dobre obxectivo de fomentar o uso responsable de antibióticos e ao mesmo tempo espertar a vocación científica entre os rapaces e rapazas, os institutos ourensáns IES O Couto e IES Blanco Amor están a acoller a celebración dunha nova edición da iniciativa MicroMundo@UVigo. Nela, as e os escolares teñen a oportunidade de pórse na pel de científicas e científicos que no seu propio laboratorio de microbioloxía buscan a solución a un problema real. [+info.](#)



O curso desenvolveuse este xoves na Facultade de Fisioterapia.

ESTUDANTES DE FISIOTERAPIA FÓRMASE NA DETECCIÓN PRECOZ DA VIOLENCIA MACHISTA

EDUARDO MUÑOZ DUVI PONTEVEDRA 06/02/2020

As e os profesionais da medicina e enfermaría de atención primaria, matronas e fisioterapeutas son “pezas clave no sistema sanitario” para a detección precoz de casos de violencia machista, como explicou este xoves na Facultade de Fisioterapia a subdirectora de Enfermería da Área Sanitaria de Vigo, Mar de la Peña. Co propósito de proporcionar aos futuros e futuras profesionais da fisioterapia unha formación inicial sobre violencia de xénero e sensibilizalos do papel que poden xogar en materia de detección precoz. [+info](#).



Esther de Blas e a directiva da asociación.

A ASOCIACIÓN DE ESTUDANTES DO PROGRAMA DE MAIORES DÁ A COÑECER A SÚA NOVA ETAPA

DUVI OURENSE 06/02/2020

Tras dous anos de inactividade, a Asociación de Estudiantes da Aula de Formación Aberta do Campus de Ourense retomou recentemente a súa actividade cun amplo programa de conferencias e visitas que se desenvolverá ao longo de todo o cuadrimestre e ata o mes de maio. Co obxectivo de dar a coñecer este relanzamento e buscar aliados para as súas accións, a nova directiva da entidade reuniuse esta semana con Esther de Blas, vicerreitora do Campus de Ourense. [+info](#).



Esta semana en Vigo proban con profesores os contidos que despois se impartirán a estudantes.

DOCENTES DE SEIS PAÍSES DESEÑAN UN CURSO SOBRE COMPETENCIAS TRANSVERSAIS PARA MELLORAR A INSERCIÓN LABORAL DO ALUMNADO

DUVI 06/02/2020

Ademais da formación académica, técnica e teórica, relacionada con cada grao, as empresas demandan cada vez máis certo tipo de coñecementos que as e os egresados non adquiren nas aulas. Son as chamadas competencias transversais ou *soft skills*, as que axudan a transformar o coñecemento en comportamento, como por exemplo a capacidade de traballar en equipo ou o pensamento crítico. [+info](#).



Un dos obradoiros celebrados na anterior edición de Elas fan CienTec.

250 RAPAZAS CELEBRARÁN O DÍA INTERNACIONAL DA MULLER E DA NENA NA CIENCIA NOS LABORATORIOS DA UVIGO

D. BESADÍO DUVI 06/02/2020

O vindeiro martes 11 de febreiro conmemórase o Día Internacional da Muller e da Nena na Ciencia e a celebración vivírase dun xeito moi especial nos laboratorios das tres escolas de enxeñaría do campus, do Cinbio e da Ecimat, xa que as investigadoras que día a día traballan nestas instalacións van compartir con máis de 250 alumnas de ensino secundario de diferentes concellos da provincia de Pontevedra a súa paixón pola ciencia e a tecnoloxía. [+info.](#)



Um grupo de alumnas participantes nos obradoiros do Cinbio.

A UNIVERSIDADE ABRE AS PORTAS DOS SEUS LABORATORIOS ÁS CIENTÍFICAS E TECNÓLOGAS DO FUTURO

D. BESADÍO DUVI 11/02/2020

Obradoiros de robótica, de programación, de videoxogos, experimentos de todo tipo no Centro de Investigación Biomédica e na Estación de Ciencias Mariñas de Toralla, e mesmo unha pequena presentación do UM19, o monopraza deseñado pola escudaría UVigo Motorsport co que compiten en circuitos reais de Fórmula 1... A Universidade abriu este martes 11 de febreiro as portas dos seus laboratorios a máis de 250 alumnas de ensino secundario e bacharelato e celebrou con elas o Día Internacional da Muller e a Nena na Ciencia. [+info.](#)



Imaxe dalgunhas alumnas coas súas obras.

17 COMENTARIOS FOTOGRÁFICOS SOBRE OS XÉNEROS

DUVI OURENSE 11/02/2020

Cada curso académico o alumnado do Grao en Belas Artes do campus de Pontevedra elabora unha mostra que baixo o título *Sen Moldes* recolle obras fotográficas súas nas que reflexionan sobre “a orde sexual imposta”. A exposición da terceira edición desta iniciativa pode verse ata o 15 de marzo na Biblioteca Rosalía de Castro do campus de Ourense, ocupando diferentes espazos do seu edificio. [+info.](#)



MÁIS DA METADE DAS EMISIÓNS DE CARBONO QUE XERA A UNIVERSIDADE DERIVAN DA MOBILIDADE

DUVI 12/02/2020

A pegada de carbono anual da Universidade de Vigo é de 27.081 toneladas de CO₂ equivalente, o que se traduce en 11925 toneladas CO₂ eq/persoa. Esta é unha medida de impacto ambiental que estuda as emisións de gases de efecto invernadoiro á atmosfera, medidas en kg de CO₂ equivalente e que a Oficina de Medio Ambiente vén empregando dende 2002 para a avaliar o impacto das actividades da institución no medio ambiente. [+info.](#)



A investigadora e profesora Beatriz Cancho explicando o traballo que realizan no seu laboratorio.

REFERENTES FEMININOS PARA ESPERTAR VOCACIÓNS CIENTÍFICAS

ROSA TEDÍN DUVI OURENSE 12/02/2020

Despois da celebración este martes no campus de Vigo de *Elas fan CienTec*, este mércores continuou na Universidade de Vigo a conmemoración do Día Internacional da Muller e a Nena na Ciencia con *Exxperimenta en feminino*, a *III Xornada de divulgación en ciencia, tecnoloxía, enxeñaría e matemáticas*. Nela, 120 estudantes e persoal docente e investigador do campus, maioritariamente mulleres, desenvolveron 14 obradoiros prácticos para 300 escolares da provincia de Ourense co obxectivo de espertar nelas e neles a vocación científica a través de referentes femininos. [+info.](#)



Consuelo Pérez, Daniel Rey, Julio Garrido, Juan M. Civildanes e Alberto Jaraiz.

ENXEÑEIROS VIGUESES CONVERTERÁN OS RESIDUOS PLÁSTICOS OCEÁNICOS EN COMPOÑENTES ECOINNOVADORES PARA A INDUSTRIA MARÍTIMA

D. BESADÍO DUVI 13/02/2020

Empregar residuos plásticos oceánicos para a creación, mediante impresión 3D, de compoñentes ecoinnovadores que poidan ser reutilizados pola propia industria marítima, podendo chegar a fabricalos en apenas uns minutos, tanto nas instalacións portuarias como a bordo dun barco. Esta é a filosofía coa que nace o proxecto europeo CircularSeas, un traballo financiado con preto de dous millóns de euros de fondos FEDER e no que participa como socio o grupo de investigación de Enxeñaría de Sistemas e Automática da Universidade de Vigo, dirixido polo profesor da Escola de Enxeñaría Industrial Julio Garrido. [+info.](#)



Gulías e Figueroa presentaron o observatorio em rolda de prensa.

INVESTIGADORES DO CAMPUS AVALIARÁN A XESTIÓN DA AUGA, RESIDUOS E MOBILIDADE DE PONTEVEDRA

EDUARDO MUÑIZ DUVI PONTEVEDRA 13/02/2020

Reunir e estruturar unha serie de datos sobre diferentes aspectos ambientais e de sustentabilidade que permitan trazar unha panorámica sobre a situación na que se atopa Pontevedra nestes eidos é o obxectivo do Observatorio PO2. Impulsado pola Concellaría de Promoción da Cidade, no marco do seu proxecto Efecto PO2, o desenvolvemento deste observatorio correrá a cargo do grupo de investigación G4+, da Facultade de Ciencias Sociais e da Comunicación, que traballará nos próximos meses na busca e estruturación de información procedente de diferentes fontes. [+info.](#)



Celebración da II Xornada olladas á antigüidade. Mulleres que entreteñen a mulleres que se entreteñen que se celebrou o ano pasado ao abeiro destas axudas.

A UNIDADE DE IGUALDADE SUBVENCIONARÁ ACTIVIDADES QUE PROMOVAN A SENSIBILIZACIÓN EN MATERIA DE XÉNERO

DUVI 13/02/2020

Promover a perspectiva de xénero e incorporar os valores igualitarios na formación, tanto académica como transversal, do alumnado. Baixo estas premisas, a Unidade de Igualdade convoca anualmente dúas liñas de axudas, unha para a organización de actividades docentes que promovan a perspectiva de xénero e outra para actividades complementarias, como conferencias, xornadas e exposicións, que contribúan á sensibilización nesta materia e á transmisión de valores aliñados coa igualdade. [+info.](#)



Anterior edición do foro, celebrado em febreiro do 2019.

CHEGA A II EDICIÓN DO FORO EMPLEO COA PARTICIPACIÓN DE MÁIS DE 30 EMPRESAS DE DISTINTOS SECTORES

D. BESADÍO DUVI 14/02/2020

Abanca, aceites Abril, Adecco, Adolfo Domínguez, Bimba y Lola, Cuatrecasas, Deloitte, Garrigues, Nationale Nederlanden... 35 empresas de distintos sectores participarán o vindeiro mércores e xoves na Facultade de Ciencias Económicas e Empresariais na segunda edición do [Foro Empleo](#), unha cita que arrancou en 2019 cun dobre obxectivo: achegar as empresas e despachos profesionais ao alumnado e ofrecerlle a estas firmas a posibilidade de que se dean a coñecer e de captar talento. [+info.](#)



A LAGOA GLACIAR DE SANABRIA, PRÓXIMO DESTINO DAS RUTAS CULTURAIS

DUVI OURENSE 14/02/2020

As [rutas culturais](#) que organiza a Área de Benestar, Saúde e Deportes da Universidade de Vigo saíran este sábado, 15 de febreiro, de Galicia para coñecer a lagoa glaciaria de Sanabria, en Zamora. Será na sétima andaina deste curso académico, que está aberta á participación de membros da comunidade universitaria e persoas alleas a ela procedentes dos tres campus da Universidade de Vigo. [+info.](#)



A EEE Forestal acolleu unha conferencia de Joaquín Araújo, dentro da Xornada Green Campus.

OS BOSQUES, A “MEDICINA ENFERMA” COA QUE COMBATER O CAMBIO CLIMÁTICO

EDUARDO MUÑIZ DUVI PONTEVEDRA 18/02/2020

Nun contexto de “catástrofe climática”, os bosques constitúen “a principal medicina para enfrontarse o cambio climático”, mais trátase dunha medicina que se atopa á súa vez “enferma”, segundo salientou o naturalista Joaquín Araújo na conferencia que este martes impartiu na Escola de Enxeñaría Forestal, no marco dunha xornada promovida polo programa Green Campus. No mundo, alertou este xornalista e divulgador ambiental, cuxa traxectoria foi recoñecida en 1994 co Premio Global 500 da ONU, destrúense diariamente “non menos de 20 millóns de árbores”, o que supón, lembrou, que “estamos destruindo o antídoto” contra os efectos do cambio climático. [+info.](#)



Clusaga celebrou unha xornada na que afondou nos retos estratéxicos do sector.

O CLÚSTER DAS EMPRESAS ALIMENTARIAS DE GALICIA ACHEGA AS NECESIDADES DA INDUSTRIA AO PERSOAL INVESTIGADOR DO CAMPUS

DUVI 19/02/2020

Co obxectivo de coñecer as liñas de traballo das persoas interesadas en desenvolver potenciais colaboracións co sector agroalimentario e de achegar ao persoal investigador as necesidades da industria, o [Clúster das Empresas Alimentarias de Galicia](#) (Clusaga) celebrou hoxe no campus vigués unha xornada, na que tamén deu a coñecer as súas accións e presentou as súas comisións de I+D+i e de sustentabilidade e economía circular. [+info.](#)



Imaxe da primeira sesión do encontro.

A MELLORA DA COMUNICACIÓN E A TRANSPARENCIA, UN RETO PARA OS CONSELLOS SOCIAIS DAS UNIVERSIDADES ESPAÑOLAS

DUVI OURENSE 20/02/2020

Comunicación, transparencia e investigación. Sobre o reto que supón avanzar no desenvolvemento destes tres eixes de traballo celébrase este xoves e venres na cidade de Ourense o encontro anual das Secretarías dos Consellos Sociais das universidades españolas. A cita, que ten lugar por primeira vez en Galicia, conta coa participación de 30 representantes destes órganos. “A comunicación é un compoñente esencial para os Consellos Sociais como xerador de confianza na sociedade”, subliñou Ernesto Pedrosa, presidente do Consello Social da Universidade de Vigo, na benvinda ás e aos asistentes. [+info.](#)



En total, son 13 estudantes dos tres campus implicados en dar coñecemento os Obxectivos do Desenvolvemento Sostible.

OS AXENTES DO CAMBIO COMEZAN A CONCIENCIAR Á COMUNIDADE UNIVERSITARIA SOBRE A AXENDA 2030

DUVI 20/02/2020

A Axenda 2030 e os Obxectivos de Desenvolvemento Sostible estanse a converter nun eixo fundamental do traballo da Universidade de Vigo no eido da responsabilidade social. Ademais de campañas de sensibilización e dous cursos para PAS e PDI que se desenvolven neste segundo cuadrimestre, outro pilar para concienciar aos membros da UVigo na importancia do desenvolvemento sostible son os Axentes do Cambio. [+info.](#)



Matesanz, Soto, Buxán, Ríos e Morquecho durante a inauguración.

UNHA EXPOSICIÓN REFLEXIONA SOBRE COMO OS ESPAZOS CONSTRÚEN A QUEN OS HABITA

EDUARDO MUÑIZ DUVI PONTEVEDRA 20/02/2020

A análise do espazo, tanto escultórico como arquitectónico, “desde a perspectiva da dimensión doméstica, da casa como refuxio, como un lugar que condiciona e constrúe as persoas que o habitan”. Esta é, como explica a artista e doutora en Belas Artes Yolanda Ríos, a liña temática en torno á que xira *Cerrar la puerta después de entrar*, a exposición que desde este xoves protagoniza na Sala X. [+info.](#)



A caixa de correo instalada na entrada de CCSS e da comunicación.

UN CHAMAMENTO A COMPARTIR VOCES FRONTE AO MACHISMO

DUVI PONTEVEDRA 21/02/2020

Comparte a túa voz é o título da iniciativa impulsada pola júnior empresa Freshysweet, integrada por alumnos e alumnas da Facultade de Ciencias Sociais e da Comunicación, co obxectivo de visualizar e denunciar aquelas experiencias machistas e sexistas que as participantes tiveran sufrido, subliñan, “polo feito de ser muller”. Desde comezos desta semana, a caixa de correo que instalaron na entrada da facultade convida tanto á comunidade universitaria como a calquera persoa que acuda ao centro a relatar, de forma anónima, aquelas experiencias nas que “en primeira ou terceira persoa”, se visen “ameazadas ou menosprezadas polo feito de ser muller”. [+info.](#)

10



O pagamento da bolsa efectuarase no prazo dun mes.

ABERTO ATA O 28 DE FEBREIRO O PRAZO DE SOLICITUDE PARA AS BOLSAS COMEDOR

DUVI 21/02/2020

O alumnado da Universidade de Vigo poderá solicitar ata o vindeiro 28 de febreiro as [bolsas comedor](#), axudas coas que a Universidade quere axudar a garantir a igualdade de oportunidades de aquel alumnado que teña unha situación económica que poida dificultar o seu acceso ou permanencia na universidade. O orzamento máximo destinado a estas axudas é, ao igual ca no curso anterior, de 280.000 euros, polo que o número de bolsas ofertadas ascenderá a 560, dotadas cada unha delas cunha contía de 500 euros. [+info.](#)



Solana, Abeleiras, Soto e Fernández, na presentación do Foro Universo Mujer.

UN FORO PARA RECOÑECER E PROXECTAR Á MULLER DEPORTISTA

DUVI PONTEVEDRA 25/02/2020

Deportistas olímpicas como a piragüista Teresa Portela e a patinadora Sara Hurtado participarán, xunto a profesoras do campus pontevedrés, xornalistas e outra serie de profesionais, nas tres mesas de debate que integran o Foro Universo Mujer, un evento dirixido a proxectar e recoñecer o papel da muller no deporte que o venres 6 de marzo se desenvolverá na sede da Vicerreitoría do campus. [+info.](#)



As investigadoras de Future Oceans Lab, Julia Ameneiro, Elena Ojea e Francesca Barazzetta e a docente do Departamento de Dereito Público Laura Movilla.

DESEÑANDO DESDE O ATLÁNTICO PLANS DE ADAPTACIÓN E MITIGACIÓN DO CAMBIO CLIMÁTICO PARA ÁREAS MARIÑAS PROTEXIDAS DO MEDITERRÁNEO

Ma DEL CARMEN ECHEVARRÍA DUVI 26/02/2020

“O mar Mediterráneo é unha das zonas do mundo onde máis se está a acelerar a subida da temperatura da auga e onde as vagas de calor son cada vez máis intensas e frecuentes”, explica Elena Ojea, docente e investigadora e responsable do Future Oceans Lab da Universidade de Vigo, que xunto a outras 14 institucións de oito países europeos, participa no proxecto Interreg Mediterráneo Engaging Mediterranean key actors in Ecosystem Approach to manage Marine Protected Areas to face Climate change” ([MPA-Engage](#)). [+info.](#)

11



Foto de familia das alumnas e alumnos encargados este ano da coordinación do foro.

O FORO TECNOLÓXICO DE EMPREGO CUMPRE 20 ANOS CUNHA EDICIÓN REPLETA DE NOVIDADES

DUVI 26/02/2020

Os vindeiros días 4, 5 e 6 de marzo as tres escolas de enxeñaría do campus abren as súas portas a unha nova edición do [Foro Tecnolóxico de Emprego](#), unha actividade que este ano cumpre 20 anos e que chega repleto de novidades, pero co mesmo obxectivo co que naceu: abrírlle as portas ao mundo laboral ao alumnado das titulacións tecnolóxicas e axudalos a orientar os seus estudos. [+info.](#)

14 REFERENTES FEMININOS EN CIENCIA, TECNOLOXÍA E ENXEÑARÍA

ROSA TEDÍN DUVI OURENSE 26/02/2020

Co gallo da conmemoración do Día Internacional da Muller e a Nena na Ciencia, o campus de Ourense acolleu a feira divulgativa *Exxperimenta en feminino*, a III Xornada de divulgación en ciencia, tecnoloxía, enxeñaría e matemáticas. Co obxectivo de darlle continuidade ao seu labor de espertar en rapaces e rapazas a vocación científica a través de referentes femininos, as súas promotoras poñen agora en marcha unha mostra itinerante por centros educativos do sur de Galicia. [+info.](#)



Foto de familia das alumnas e alumnos encargados este ano da coordinación do foro.



Miguel d'Ors e Manuek Morquecho presentaron o programa do ciclo na sede da Vicerreitoría.

UNHA SEMANA NA QUE A POESÍA É A GRAN PROTAGONISTA

EDUARDO MUÑIZ DUVI PONTEVEDRA 27/02/2020

Reunir poetas e poetisas de diferentes xeracións, chegados desde diferentes partes do Estado, e cuxa obra teña dous denominadores comúns, a súa calidade e a súa capacidade para chegar ao público. Estes son os criterios que rexeron a organización ciclo *6 días, 6 poetas*, que a Vicerreitoría do campus promove co obxectivo de achegar este xénero literario á cidadanía e que desenvolverá a súa terceira edición entre o vindeiro luns 2 de marzo e o sábado 7. [+info.](#)

12



Foro de familia do alumnado que chegou estes días para comezar o segundo cuadrimestre.

644 ESTUDANTES INTERNACIONAIS ELIXEN A UVIGO PARA COMPLETAR A SÚA FORMACIÓN

DUVI 27/02/2020

Alemaña, Italia, México e Francia son os principais países de orixe do alumnado estranxeiro que neste curso completa os seus estudos nos tres campus da Universidade de Vigo. En total, son 644 mozos e mozas de catro continentes os que elixiron a UVigo para estudar, 108 durante todo o ano, 290 no primeiro cuadrimestre e 246 no segundo. A estes últimos a institución académica deulles a benvida hoxe xoves cun acto informativo no paraninfo do edificio Ernestina Otero, cun petisco posterior no Teatro Vidal Bolaño para fomentar a relación entre eles. A vindeira semana terán lugar os actos en Pontevedra, o luns, e en Ourense, o martes. [+info.](#)

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640